

Egipatska policija upucala dva demonstranta

3 februar 2012 Izmijenjeno 07:50 CET

Najmanje 668 ranjenih u Kairu u protestima protiv policije, nakon sukoba nogometnih navijača koji je odnio 74 života



Demonstranti se sukobili s policijom ispred Ministarstva unutrašnjih poslova [EPA]

Najmanje dvoje ljudi je ubijeno u Suezu kada je policija upotrijebila bojevu municiju da suzbije demonstracije građana koji su se protivili neuspjehu snaga sigurnosti u sprečavanju nasilja nakon nogometne utakmice u kojem su poginule 74 osobe. Svjedoci su kazali da je u ranim jutarnjim satima u petak izbio sukob ispred policijske stanice u Suezu, na sjeveroistoku Egipta, nekoliko sati nakon što su dva muškarca ubijena. "Dobili smo dva leša demonstranata koje je usmrtila bojeva municija", kazao je ljekar zaposlen u mrtvačnici za Reuters.

Stotine ranjenih

Ranije, oko 668 ljudi je ranjeno tokom demonstracija u prijestolnici Kairu, saopćilo je ministarstvo zdravstva. Policija je u četvrtak upotrijebila suzavac protiv demonstranata koji su se približili zgradi Ministarstva unutrašnjih poslova, pokušavajući izraziti nezadovoljstvo nakon krvavih obračuna između fudbalskih navijača.

Al Jazeera reporterka **Sue Turton**, koja izvještava iz Kaira, rekla je da su demonstranti napali zgradu ministarstva u blizini trga Tahrir, pokušavajući da uklone barijeru od bodljikave žice.

"Sve ovo se odvija u neposrednoj blizini trga Tahrir, ali je u ostatku Kaira situacija normalna", rekla je ona.



U Egiptu su proglašena tri dana žalosti [Reuters]

Iz liječničkih se izvora doznaje da je zbog suzavca ozlijeđeno najmanje 20 ljudi. Demonstranti, koji su skandirali protiv vojne vlasti i policije, bacali su kamenje na pripadnike policije za suzbijanje nereda. Na susjednom trgu Tahrir, svjedoci su vidjeli najmanje pet kola hitne pomoći koja su se uputila na mjesto okršaja, navodi Hina.

Stadion u Port Saidu siguran

Ekspert Međunarodne fudbalske federacije (FIFA) za stadione pohvalio je egipatski grad u kojem su u srijedu u neredima fudbalskih navijača stradale najmanje 74 osobe i ocijenio da je nasilje bilo planirano. Walter Gage je rekao da je stadion u Port Saidu "dobar" i da je "apsolutno bezopasan" za gledaoce.

Gage, zvaničnik FIFA i savjetnik na afričkom Kupu nacija u Gabonu u Ekvatorijalnoj Gvineji, prethodno je pregledao stadion u Port Saidu, koji je bio domaćin utakmica Kupa nacija 2006. i mečeva svjetskog prvenstva za igrače do 20 godina 2009. "Fudbalski zvaničnici ne mogu izbjeći problem ako se radi o organiziranom nasilju vezanom za utakmicu", rekao je Gage.

U srijedu navečer su u Port Saidu, na sjeveru zemlje, poginule najmanje 74 osobe u sukobima navijačkih skupina klubova al-Masry iz Port Saida i al-Ahly iz Kaira.

Izvor: Al Jazeera